

李文忠公奏稿

李文忠公奏稿

卷之四十一目錄

覆陳直隸河工情形摺

光緒七年五月二十日

酌改三廳移兵控扼摺

光緒七年五月二十日

堵築東明黃河決口摺

光緒七年六月初九日

東明移設廳汛協撥經費片

光緒七年六月初九日

大清潭沱各工完竣摺

光緒七年六月初九日

瀕龍河並千里隄工片

光緒七年六月初九日

李鳳苞仍賞花翎片

光緒七年六月初九日

請獎王得勝片

光緒七年六月初九日

兵差報銷酌議章程摺

光緒七年六月初九日
附清單

遵議鴉片釐稅事宜摺

光緒七年六月十六日

議設洋藥公司片

光緒七年六月十六日

創設公司赴英貿易摺

光緒七年六月二十日

王德均暫緩赴吉片

光緒七年六月二十日

職官句串洋人強詐摺

光緒七年六月二十日

修竣津城濠牆摺

光緒七年七月十五日

飛虎船救護壞船請獎片

光緒七年七月十五日

籌濟吉林機器片

光緒七年七月十五日

李朝儀政績摺

光緒七年七月十五日

裁遣霆營片

光緒七年七月二十九日

巴西增刪條約摺

光緒七年閏七月初八日

請催粵海關欠解海防經費摺

光緒七年閏七月初八日

熱河圍場移駐弁兵摺

光緒七年閏七月初十日

釐定商船津貼摺

光緒七年閏七月初十日

李文忠公奏稿卷四十一

全集一之四十一

桐城吳汝綸編錄

覆陳直隸河工情形摺

光緒七年五月二十日

奏為覆陳直隸河道地勢情形節次辦法恭摺仰祈

聖鑒事竊臣欽奉光緒七年二月三十日

寄諭左宗棠奏擬調馬步各營興修水利等語據稱順天府山直隸正定等處近年地勢迥異從前不修水利則旱潦相尋民生日蹙治水之法下游宜令深廣上游宜多開溝洫擬令所帶現紮張家口各營移治順天直隸上游水利其下游津沽等處仍由直隸總督經理著李鴻章董華李朝儀將各該處地勢情形及應如何辦理之處會同籌議具奏等因欽此並准順天府尹臣咨請主稿會奏前來伏查近畿水利關係

國計民生興修無待再計臣莅直以來體經繁酌籌辦未敢稍涉
漠視惟限於地勢財力河淀又受病過深有難盡利無害者溯自
宋元迄明代有興作實效鮮聞惟北宋何承矩就雄霸等處平曠
之地築堰爲障引水爲塘率軍屯墾以禦戎馬專爲設防起見今
之東西淀皆其遺址維時河朔本多曠土堰外卽屬敵境聽其旱
澇無關得失故可專利一隅厥後人民日聚田疇日闢野無棄地
不能如前之佔地曲防故治之之法亦復不易我

朝康熙雍乾年間屢蒙

聖祖仁皇帝

高宗純皇帝巡行規畫捐授機宜

命賢王重臣董理其事先後歷時數十年官民用費千百萬濬築
兼施節宜備至始克奏功然旱澇仍不能免卽如雍正四年甫

工竣而五年夏秋水定等河漫決多口各屬被水者三十餘州縣其營成之水田又因缺雨難資灌溉未幾而多改旱田蓋河道本來狹隘既少餘地開寬土性又極鬆浮往往旋挑旋塌且渾流激湍挾沙壅泥沙多則易淤土鬆則易潰其上游之山槽陡峻勢如高屋建瓴水發則萬派奔騰各河頓形壅漲汛過則來源微弱冬春淺可膠舟迺不如南方之河深土堅能容多水源遠流長四時不絕也伏讀乾隆二十七年十一月

高宗純皇帝諭曰從前近畿議修水利營田未嘗不再三經畫始終未收實濟可見地利不能強同等因欽此

聖謨燭照洞見本原此往事之可考而知也乾隆以後未興大役道咸以後軍需繁巨更兼顧不遑卽例定歲修之費亦層疊折減於是河務廢弛日甚凡永定大清滹沱北運南運五大河又附麗

五大河之六十餘支河原有閘壩隄埝無一不壞減河引河無一不塞其正河身淤墊愈高永定河在雍乾時已漸高仰今視河底竟高於隄外民田數丈昔人譬之於牆上築夾牆行水非一日已而節宣西南路諸水之南泊北泊節宣西北路諸水之西淀東淀又早被濁流填淤或竟成民地其河淀下游則僅恃天津三岔口一縷海河迤邐出口平時既不能暢消秋冬海潮頂托倒灌自胸膈腸腹以至尾閘節節皆病是以每遇積澇盛漲橫衝四溢連成一片順保津河各屬水患特重此同治十年前後之情形也曾國藩莅直時首以治河爲務而未克興辦大工臣接任後適值連年大水疊次迭員周歷勘驗並隨時親自察度詳稽往牘博采羣言求所以修治五大河東西淀之法蓋五大河爲一省之綱東西淀爲各河之匯須先從此入手若房山正定一帶尙非急切者五大

河中以永定河之害爲最深然盧溝以上東於兩山之閒向無工
程其病實在盧溝以下須挑去二百餘里申浚一二丈之積沙方
能順軌否則以南隄爲非隄而改河使南另築南隄以障之亦可
安流弭節而去此二策者勞費皆不可勝計若挑去全河極厚之
積沙自來無此辦法亦無出沙堆積之處若改南隄爲非隄則固
安永清兩縣城近靠南岸須議遷建尤於民情不順其大清北運
南運則須分別挑濬河身加築隄埝修復閘壩減河始保安瀾統
計工程皆極繁巨萬萬無此財力渾沌趨向無定自來不設隄防
同治七年由薊城北徙以文安大窪爲壑其故道之難復上游之
難分下游之難洩曾國藩與臣均詳陳有案東西淀寬廣百數十
里淤泥厚積人力難施此費鉅工艱不能大辦之情形也考之往
事既如彼揆之今情又如此臣日擊時艱既不敢籲求巨帑於

君父又不忍坐視顛沛於民生只有逐漸設法量力補救豈有畏難苟安任其自盈自涸之理頻年以來修復永定河金門關及南上北三次壩以資分洩裁彎切灘以紓溜勢加築隄段添備麻袋土車以助搶險大清河則於新雄境內開蘆僧減河於霸州文安境內接開中亭河勝芳河以分洩上游盛漲於任邱開趙王減河以分洩西淀盛漲並將隄埝分別修築今年又於文安左各莊至臺頭挑挖河身二十六里寬十餘丈深丈餘以暢下游去路滹沱河則於河間及文安窪陷開引河兩道今年又於獻縣朱家口月關減河三十餘里均歸子牙河達津以輕河獻任雄霸保文大積患北運河則於通州築壩挽復潮白河歸槽不使橫溢於香河王家務武清筐兒港修復石壩以減漲水於天津霍家嘴疏濬引河以通下口今年又於武清寶坻境內挑挖筐兒港王家務兩減河

河身以資暢洩南運河則於青滄靜海等處修復隄工二百餘里
因東境四女寺哨馬營直境捷地興濟四處減河久廢遂於靜海
之靳官屯另開減河六十餘里使別途出海不併注於津河又於
天津城東永定大清滹沱北運交會之陳家溝開河百餘里以分
洩四大河之水運達北塘入海庶免海河過於壅滯其無深蘆博
高陽一帶則堅築滹龍河隄以防滹沱北越任邱至天津一帶則
加築千里隄格淀隄使河自河而淀自淀西沽韓家樹上至東淀
則用西洋機器船節挖淺水路已通又於廣平開沽河順德挑
運河趙州滹沱槐午河及此外各屬河道隄壩受害較深者亦隨
時酌量疏築並令地方官民於無礙運道官隄之處或擇開溝洫
或辟水灌地有泉源者察石疏濬距河道者開鑿井眼若河間府
屬井工則係專案辦理以上歷年所需工費除勻撥賑款捐項以

工代撫外並抽調淮練各軍分助挑辦淮軍統領周盛傳更於津東之興農鎮至大沽創開新河九十里上接南運減河又於減河兩旁各開一渠以便農民引灌其興農鎮以下又開橫河六道節節挖溝引水營成稻田六萬畝且耕且防海疆有此溝河亦可限戎馬之足此臣頻年就賑捐兵力竭蹙經營之情形皆有奏牘可稽者也自來河道必須上下游並治是以臣於各河上游或修復閘壩酌開減河以資分洩下游或挑濬正河添闢減河以暢去路近年順保津河各屬水患較輕尙不致橫衝四溢連成一片但值廢弛已甚之後官民交窘之時迥與康熙乾隆年間情事不同僅能量力補苴實無從更張大舉若欲使各河一律順軌則必需定鉅費先將永定河白盧溝以下二百餘里改河築隄可保數十年無患又將大清河雄縣一帶之淤窄挑寬濬深北運南運河卑薄

未補之隄埝淤廢未復之減河分別加修東西淀南北泊及津東之塌河等淀爲節宣諸水之區尤宜設法疏濬便可容受蓄洩並將西淀上游諭高境內之瀦龍河淤窄挑濬寬深再次則酌修各屬支河及畿東之薊運等河務使脈絡貫通經緯畢具悉去胸膈腸腹尾閘之病然後廣開溝洫相濟爲用庶水害旣除而水利可興不致此旱彼澇此盈彼涸惟統計最要次要各工甚巨卽如永定一河若照議興辦土方不知凡幾其一切閘壩物料工用器具佔用旗民地等項爲費亦復不貲實非數營兵勇所能辦到臣部淮練各營僅二萬餘人分紮海防邊防及內地各要隘修築礮臺彈壓地面緝捕盜賊各有專司只能抽暇就近酌調助役勢難全撤要防停罷操巡以致顧此失彼今年濟文安之大清河開獻縣之漳沱減河挑寶坻武清之北運減河並於高陽修瀦龍河隄任

邱修千里隄全賴東南各省官紳集捐協助始克就緒然已竭忠盡歡此後斷難爲繼本省向係缺額入不敷出更無餘款可籌儻能如康雍年間故事約計現在應辦工程先行由部按年撥給銀百餘萬兩自可分投勘議招雇民夫助以兵勇及時擇要辦理次第興作惟部庫拮据外省支絀伊犁等項尙待籌付竊恐一時難集鉅款似仍只能量力籌辦未便剋期奏效左宗棠以所帶各營移治上游正可輔直力之不逮前已咨請飭挑涿州北關外拒馬河淤沙以試其端並經左宗棠不辭勞瘁親履察勘惟本屆伏汛將臨盛漲卽至難再別施畚鍤此後應修何處卽由左宗棠察酌隨時會商當飭地方印委實力襄助相與有成徵臣忝司守土兼任河工實無旁貸昨已督飭司道詳催勘議無論上游下游仍當統籌兼顧盡其力所能行以期遂漸補救惟賑捐旣已停止

本省又無款項可籌將來必不可少之工需只可奏懇山部酌撥以資接濟此現時統籌酌辦之情形也正在具摺開接准部咨以左宗棠前奏水利事宜業經醇親王遵奉

懿旨擬奏蒙派恭親王醇親王會同左宗棠及臣等妥議奏辦等因仰見

朝廷廬念民生慎重水利至意鈔摺咨呈恭親王醇親王並者左宗棠酌核仍隨時會籌議辦外所有臣等原奉

寄諭統籌酌辦緣由合先會同兼管順天府府尹臣董華署順天府府尹臣張凱嵩恭摺由驛覆陳是否有當伏乞

皇太后

皇上聖鑒訓示遵行謹

奏

酌改三廳移兵控扼摺

光緒七年五月二十日

奏爲口外張獨多三廳地方甚關重要今昔繁簡情形不同請將理事廳員酌改撫民要缺並於多倫移駐武職大員添設三廳捕盜兵弁以資控扼恭摺仰祈

聖鑒事竊照宣化迤北之張家口獨石口及塞外之多倫諾爾同設理事同知各一員管理滿蒙漢民事件縣丞巡檢數員或分防地而或經理獄務張家口獨石口各設副將一員佐以都司千把等官多倫則僅都司一員千把總三員其原定廳員缺分及多倫營制本從簡約在地方無事之時已覺不甚得力自口外荒地漸開遠近流民日益趨附馬賊亦出沒靡常近年盜劫獄訟之繁數倍往昔張獨兩廳所管地面皆在口外本甚遼闊東通熱河圍場西北接連察哈爾及蒙古各游牧而多倫諾爾更在張獨之北距

宣化五百里所屬之白岔經棚且距宣化千里鎮道皆駐口內勢
難兼顧其地界與圍場游牧處犬牙相錯白岔經棚西北兩面
又有至庫倫瀋陽之商路及吉林黑龍江入關必由之大道路徑
分歧四通八達控制極難圍場素爲盜藪原設各滿蒙卡倫又久
廢棄於是盜賊橫行劫財傷人之案無時不有商民深受其害
於去夏商派前甘州提督曹克忠前往該三廳察勘形勢飭宣化
鎮總兵王可陞暫撥練軍馬隊兩營分往獨石口至多倫爲一路
多倫至白岔經棚爲一路擇要巡緝搜剔賊蹤漸戢然必地方
武得人乃可常資整理查張獨多三廳均屬京北邊外緊要地方
外防先宜內治近既荒地日闕民居日多撫字催科聽訟捕盜極
應慎重且現定中俄新約張家口准俄民建造鋪房行棧此後交
涉事件益繁並准俄商由尼布楚運貨至張家口據曾紀澤兩稱

凡布楚人邊後必從喇嘛廟即多倫諾爾行走是該處緝捕巡防
尤爲當務之急庶免滋生事端貽人口實臣悉心籌度並據濟臬
兩司口非道具詳約有應行變通者三端一擬將該三廳改爲撫
民同知要缺向例張家口獨石口同知缺出以候補理事同知請
補如候補無人由吏部於記名理事人員內揀補多倫諾爾同知
缺出於現任候補理事人員內調補惟此項候補記名理事人員
往往僅能繕譯清漢文字而於地方之利弊民生之休戚茫然不
知並有因精力就衰才具平庸改銓此職者以未諳民事之員遽
令理繁治劇貽誤實多該廳近年情形實係衝繁疲難非素有歷
練通曉政體民情長於緝捕之員斷難勝任應請嗣後均改爲撫
民同知要缺並酌照熱河奉天各州縣滿漢兼用成案遇有缺出
於直隸通省滿漢同通州縣實缺候補中擇其入地相宜者分別

升調請補仍令該管口北道嚴加督飭隨事認真整頓庶吏治漸
有起色其原有佐雜等官應循其舊一擬於多倫廳移駐武職大
員該廳孤懸塞外幅輒寬廣非係山溝卽屬草地前據曹克忠勘
復其間要隘甚多自多倫北至樺木溝大小克圖白岔經棚劉家
營子一帶較張家口一路尤爲喫緊且與滿蒙各旗時有交涉事
件非都司所能聯絡查張家口距宣化僅六十里宣化係總兵駐
紮之所儘可就近兼管該口營伍且該口尙有察哈爾都統督率
旗營駐紮不必再有副將分防應請將張家口副將移駐多倫作
爲協守多倫諾爾等處副將會同該廳詳察地勢要隘酌撥分汛
往來彈壓嚴緝盜匪保護商民仍歸宣化鎮統轄副將品秩較崇
凡遇緝匪等事應令與滿蒙各旗會商妥辦勿任此紮彼竄其原
設多倫營都司本歸獨石口副將管轄今應作爲多倫副將中軍

無庸再屬獨石口協標至張獨兩協汛地本屬毘連今張家口協改駐多倫應將該兩協原管營汛距多倫較近者歸多倫協副將管轄距獨石口較近者歸獨石口協副將管轄統令宣化鎮會商口北道督同該兩協酌量勻撥其原設多倫兵弁不敷卽由該兩協簡僻營汛內抽撥移駐或酌撥宣化練軍馬隊交該副將管帶駐防所有張家口協原有中軍都司卽作爲張家口營都司改隸鎮標統俟移撥事竣各部立案應換文武各員印信並俟咨部換鑄應需多倫協副將衙署責成道廳撥節估辦至多倫協副將都司獨石口協副將張家口營都司均係要缺嗣後遇有缺出並請滿漢兼用由外揀選明幹耐勞巡防得力之員分別升調請補以期人地相宜一擬添設三廳捕盜弁兵查口外與內地情形不同非州縣馬快等役所能濟事是以張家口獨石口兩廳向例各設

捕盜營經制千總一員把總一員外委一員馬兵三十九名歸廳
員管轄專司捕盜惟草地寬廣實屬不敷調撥應請添給張家口
廳外委一員馬兵三十九名獨石口廳馬兵二十名多倫廳從前
未設捕盜兵弁應請添設經制千總一員把總一員外委一員馬
兵三十九名仍各歸廳員管轄調遣酌添營房器械擇要扼紮令
與綠營弁兵認真巡緝儻敢逆賊殃民即按軍法從事遇有考拔
弁兵額缺照舊由廳員詳道驗補咨司核轉應添俸廩糧乾等項
由藩司照章核撥即於各該廳經徵升科地糧內留支劃抵以免
遠道請領跋涉之煩以上三端皆係因時制宜變通辦法期於邊
要地方有裨是否有當理合恭摺具陳伏乞

皇太后

皇上聖鑒敕部迅速核擬施行謹

奏

堵築東明黃河決口摺

光緒七年六月初九日

奏爲堵築東明高村黃河南隄漫口大工及搶辦上下游險要工
段一律完竣並遵保出力員紳恭摺仰祈

聖鑒事竊直隸東明縣黃河南隄於上年九月三十日霜清後高
村奇險疊出漫刷成口當經分別參辦奏派道員用候補知府北
運河務關同知吳廷斌前往會同大名鎮總兵徐道奎大順廣道
劉盛藻妥速勘籌堵築其時口門已及二百丈中有刷成串溝五
六道水深五六尺及丈餘且大溜逼近口門勢甚洶湧日益衝刷
必須挑開溜勢趕堵串溝並於隄裏先築套隄以期迅速合龍然
後補築大隄卽據各該員親駐工次督率練兵民夫分投趕做於
十一月初一日合龍其漫出之水僅由東明至東省荷澤鉅野嘉
祥而止距運河南陽等湖尚遠絕無衝溢之患東明以下沿路水

勢微弱亦無損傷人口並接山東撫臣周恆祺函稱平地漸次涸復窪處不過二三尺無礙大局當於十一月十二日

奏報聲明俟隄外泥水稍乾有土可取即將補築大隄及一切善後事宜妥籌辦理其在事員弁紳董俟全工告竣查明保獎等因

奉

旨允准欽遵在案臣飭該鎮道與吳廷斌詳加勘估應補築高村大隄二百四十五丈七尺六寸底寬連埽靠十九丈六尺頂寬十丈高一丈六尺北首接築戢隄一百一十一丈六尺底寬二丈八尺至七丈二尺頂寬一丈八尺至六丈二尺高一丈二尺五寸連北加築攔水斜埽二百四十丈底寬九丈頂寬四丈高一丈南首接築戢隄一百五十丈底寬三丈至七丈八尺頂寬二丈二尺至六丈八尺高一丈一尺八寸至一丈四尺大隄後身加築月隄一千

五百四十五丈底寬九丈頂寬三丈高一丈又前而南首加築頂道挑水壩三百丈底寬十一丈頂寬六丈高一丈二道挑水壩七十丈底寬九丈頂寬四丈高一丈又沿隄做水埽六十三段計長三百七十八丈寬四丈至六丈鑿出水面一丈頭道挑水壩做水埽九段計長四十五丈六尺寬二丈四尺至三丈鑿出水面一丈二尺旱埽五十九段計長二百九十五丈寬一丈六尺至二丈鑿高一丈二尺二道挑水壩做裏頭水埽三段圈長十五丈寬二丈鑿出水面八尺此高村新工辦法也上游李連莊下游黃莊皆溜偏隄根黃莊尤形危險應於李連莊大隄後身加築月隄二千八十丈底寬七丈五尺至十丈頂寬三丈至五丈高九尺至一丈前面河灘築欄水埽四百五十丈底寬八丈頂寬四丈高八尺其黃莊大隄後身原有月隄一千一百二十丈日久卑薄今加培底寬

十丈頂寬四丈高一丈一尺前面北首做挑水護隄壩二百六十丈底寬八丈頂寬四丈高八尺南首築攔水埝三百九十丈底寬五丈至八丈頂寬一丈五尺至四丈高五尺至八尺沿隄做水埝九十一段計長五百四十九丈八尺寬四丈至六丈鑿出水面一丈此上下游李連莊黃莊加築工程辦法也去冬擇要趕辦之後今春開凍復調集練軍民夫分投興辦至四月初旬全工報竣臣委令候補道萬國順馳往逐細驗收據報丈尺有盈無絀築做均甚堅固層土層礮毫無草率偷減並據鎮道等查明出力員弁紳董請獎前來除酌定修防事宜另行具

奏並將用過銀兩俟查核明確開單

奏報外臣查東明黃河南隄關係東南運道民生甚巨若不即時堵合一經春融水漲勢必泛濫橫流爲害滋大是以嚴飭各員趕

緊搶辦甫及一月卽報合龍然其時正值西北風大作波浪翻滾
水益擡高溜勢愈挑愈猛埽段隨鑲隨墜串游此堵彼陷情形甚
爲喫重口門陡閉後大河全身側注幾有復潰之虞今年凌桃二
汛大塊冰凌衝下河水屢次增長埽壩疊被塌沒各工岌岌可危
幸經各員親率兵夫加勁趨做不分曉夜風雪出死力以相爭故
能克期成事一律完固各該員督率兵夫於寒天冰凍之中露體
逸足力挽狂瀾開春後又搶辦該處及上下游埽壩段數千百
丈其中水埽幾及千丈皆鑲出水面一丈鑲入水底二三丈統計
工極繁重且甚艱難在事員弁及開東長三州縣紳董數百人兵
夫萬餘人經歷七月餘之久日無休息膚裂趾腫履險蹈危罔惜
身命實屬異常勞苦與躬日鋒鏑者無異其所用經費皆核實撥
節除練軍二千人向例不領工價外閒用民力幫築月隄統計所

省不少大名本無河工是以調用地方員弁而附近紳董亦皆奮
勉趨公始終罔懈自應一併擇尤請獎謹分別開單恭呈
御覽仰懇

天恩俯准照擬給獎以示鼓勵至道員用候補知府北運河務關
同知吳廷斌搶辦全工力籌補救躬親督率倍著勤勞擬請

旨俟同知開缺後以道員補用其應給千把及五六品頂戴者咨
月咨部註冊所有堵築東明高村黃河南隄漫口大工及搶辦上
下游險要工段一律完竣並遵保出力員紳緣由理合恭摺具陳

伏乞

皇太后

皇上聖鑒訓示謹

奏

東明移設廳汛協撥經費片

光緒七年六月初九日

再東明黃河地勢本係北高南下近年大溜愈趨愈南緊逼隄根以致高村李連莊黃莊頓成巨險今年二三月間盛次水漲蟄埽鬪隄黃莊尤爲岌岌皆經員弁竭力搶護始就平穩凌桃小汛如此伏秋大汛可知前有隄南十里外添築造隄以爲門戶外障之議但工費太鉅直東均無此財力因飭鎮道等擇要修做月隄埽段藉資抵禦酌加挑水壩以冀挑開溜勢現已一律工竣此隄創立之初距河尙遠無甚要工每屆汛前抽調大名練軍前往修防酌量撥給料價霜降以後撤隊回營並無專員經營亦無撥定經費現在河流側注險工疊出情形迥異從前上年高村失事可爲鑒戒亟應變通辦理酌設廳汛專管俾可常年修守以重責成查大名漳河同知衙署原在東明嗣被黃水淹塌遂移駐大名龍

王廟今尙賃屋而居漳河本無工程應令該同知仍回東明卽駐高村南岸適中之地作爲廳官專管東明全境黃河隄工並令漳河縣丞移駐上游李連莊開州州判移駐下游黃莊均作爲汛官分管該縣境內首尾各汛黃河隄工仍歸廳官督率該同知原有兼管地方事宜應循其舊漳河縣丞本任並無要務應卽專管黃河至黃莊係開州州判本管地面距原駐之處僅隔一河其本任事件無多仍可兼顧所有該員等廉俸役食等項循舊支給衙署月籌建蓋嗣後大名同知漳河縣丞開州州判三缺均作爲河工繁要之缺由司道遴選熟悉河務廉幹耐勞之員詳請酌補應否月鑄印信再核議詳辦現飭暫屈河兵數十名並於距隄十里內外村莊酌撥汛夫歸該廳汛調度派大名練軍步隊一營分駐各汛卽令營哨官會同該廳汛常年駐紮勸督兵夫講求修防東明

縣知縣應協同防守並經辦派撥汛夫等事仍歸大順廣道統轄
節制認真督率廳汛營哨實力經理務於要工有裨儻大汛期內
險工增多現有兵夫不敷應用卽由鎮道會商添調練軍馳往協
防惟隄長六十里既經節節生險必應添辦料物責成廳汛營哨
隨時設法修搶免誤機宜約計稍料一項每年需用一千五百萬
斤其蘇繩樁檝等項稱是且河務繁重移駐各員原有廉俸不敷
辦公均應酌給津貼以及河兵口糧汛夫方價一切雜項樽節合
算每年必須銀四萬兩方敷應用直隸著名瘠苦庫藏奇絀民力
拮据萬難全數籌撥此隄於直境僅止東明一隅利害實在東省
是以前係升任山東撫臣丁寶楨建議資助興築既經設防於前
自應同力合作共資保衛除今年防費暫由臣竭力湊用外擬請
旨敕下山東撫臣白光緒八年起每年協撥修防經費銀二萬兩

於頭年秋冬間就近解交大名道庫以便乘料價平減道路乾燥
之時購運工次其餘一半銀二萬兩即由臣督飭司道設法挪湊
應急東省庫儲情形雖非昔比每年僅籌二萬兩尚不爲難而黃
隄要防庶免費紕貽誤事關東省民命財賦如此各半籌濟亦得
事理之平除未盡事宜飭道隨時妥籌稟辦外所有東明黃河南
隄現擬酌設營汛並派練軍常年駐工修防請由山東協撥經費
緣由理合附片陳明伏乞

聖鑒訓示施行謹

奏

大清滹沱各工完竣摺

光緒七年六月初九日

奏爲挑挖大清河下游並片開滹沱城河修濬北運減河各工均已剋期完竣恭摺仰祈

聖鑒事竊臣前因大清河自文安縣左各莊至臺頭係入淀尾閘高仰狹窄每屆汛漲停積不下上游因之壅潰近河州縣頻受其害必須挑挖寬深使河水暢洩東淀達津入海又滹沱河自北徒後故道難於挽復其現行古羊河下游本無出路沿河州縣受害甚深文安窪久成澤國總經設法籌度須於獻縣朱家口古羊河東岸片開減河使其分歸子牙河達津入海當於去冬派員分往詳細察勘議定工程做法大清河下游委助辦直賑之浙江紳士候選道金福曾督辦滹沱減河委候補道史克寬督辦所需工費商懇東南各省官紳集用濟助不敷之數飭司道竭力挪湊仍集

附近災民以工代賑業於今年正月

奏報在案又寶坻縣境內有王家務減河上自香河入境下達甯河七里海武清縣境內有篋兒港減河下入天津塌河淀該兩河皆分減北運河盛漲寶坻一河年久失修節節阻塞隄亦坍塌兩岸數百村連年被水武清一河早為居民佔種前於同治十三年月開新河復被民間盜決隄防填淤河道皆應擇要修濬當派候補道周金章候補通判袁遂分往勘議興辦寶坻約需漕米二萬三千餘石銀二千兩武清約需漕米二千九百石銀二百兩一併以工代賑均自二月中旬起次第開工五月初旬陸續報竣計大清河下游從左各莊至壘頭二十八里零挖口寬十二丈至十四丈底寬五丈五尺至八丈七尺挖深一丈三四尺河形漸去漸低挖深亦漸去漸減至壘頭淀邊挖深八九尺其挖出之土送至上

丈以外分別培隄攔水又因左各莊以上任莊河流偪束酌展河身二百丈又因非而中亭河淤淺就便挑挖七百八十餘丈並裁去淤灘一百九十餘丈堵築決口七處此大清河下游工程里數丈尺辦法也滹沱滅河自獻縣之朱家口起至子牙河長三十三里零挖口寬十一丈至十五丈底寬五丈至十二丈高處挖深一丈九尺最窪處挖深七尺於兩旁五六七丈以外出土堆築南北新隄底寬五六丈頂寬二丈二三尺高一丈三四尺又於南隄修砌涵洞五道以洩隄裏滙水其當窪心之處空留三百餘丈月挑引河以收南窪漫流歸河李謝留鉢野廠三村共建木橋三道並將舊有賊家橋修建完整以便行旅其附近子牙河古羊河隄決口一併堵築此滹沱滅河工程里數丈尺辦法也寶坻北運滅河自大白莊起至嘎口嘴長三十一里零挖口寬十三四丈底寬五

六七丈因地勢低窪下游七里海高仰恐致倒漾只能挖深二三尺至五六尺兩面出土各於二十丈外築成長隄底寬五丈頂寬一丈六尺高七尺中段舊有遙隄不能束水亦移近改築又減河之東有袖針河隄工自黃莊至楊岡莊兩岸各長三十三里零亦已廢壞遂於河中取土加培底寬三丈頂寬一丈一二尺高四尺至六尺裁去河邊蘆灘十餘里並修楊岡以外窩頭河東埝五百餘丈武清北運減河自王老莊至楊家河長十七里零挖口寬三丈至七丈底寬三丈至五丈因經費支絀先加深一尺至四尺卽以挖出之土加培南隄月修沈莊等處南隄一千一百餘丈大小莊等處北隄一千六百餘丈於吳辛莊大康莊各建木橋一座此寶坻武清北運減河工程里數丈尺辦法也臣於工竣後親往大清河下游並委清河道葉伯英候補道萬國順候補知府吳中彥

分往漳沱減河北運減河逐一驗收丈尺均過原估毫無草率偷減用費亦均核實應俟截數仍歸賑案彙開清單奏報北運減河有此槽道隄工汎漲水至可資約攔分洩尙有應行加深及上下游疏濬工程來年續籌辦理大清河下游自開壩後溜勢甚爲迅疾上游河水驟落尺餘新開河道刷深自左各莊至臺頭皆水深一丈以外有過流直下之勢現又將新河兩灘及臺頭淀邊蘆葦分別刈除以免阻礙河流其入淀淤淺之處人力難施再飭西洋機器船逐漸接挖至漳沱新減河地形極順深得吸川之勢自開壩後大溜滔滔東去衝刷河灘不少已將原走古羊河之渾水全行奪入新減河其漫流南窪之渾水亦由引河洩入新減河併注于牙刻下古羊上游河底吸深尺餘渾水驟落五尺古羊下游渾水竟已斷流據文安縣稟報該縣窪水日落現在深者四尺餘淺

者僅七八寸可種稻者一百二十餘村已成旱地者七十餘村不能種者一百十餘村等語若新減河再衝刷寬深伏秋盛漲必能奪古羊全溜則獻縣以下八州縣從此積患可除文安窪有涸復之日獻縣以上州縣亦獲暢消之利殊於大局有裨除分飭籌議修守章程核定飭遵外至此次工程多於水中開挖且有老蘆叢密不堪駐足之處在事人員胼胝經營力任艱苦剋期告成其南省官紳不分畛域代集巨款遠來挑辦尤屬異常奮勉殊堪嘉尙

容臣遵照前奉

俞旨擇尤酌請獎敘以昭激勸所有挑挖大清河下游並月開濬沱滅河修濬北運減河剋期工竣緣由理合恭摺具陳伏乞

皇太后

皇上聖鑒謹

奏

瀕龍河並千里隄工片

光緒七年六月初九日

再保定府屬之瀕龍河上承唐沙滋三水會於邠州三岔口經安平博野蠡縣高陽而入西淀此河亞於五大河而水性湍悍奔騰盪決往往衝蕪民田於莅直後已飭修復南北兩隄逐年加修督民防搶前查蠡縣社甲公隄高陽駝灣一帶河身淤曲兩隄卑薄盛漲每易衝塌因飭清河道葉伯英察勘估辦惟展寬河身需費甚巨無從籌措只可擇要培隄以資抵禦酌挑淤灘以紓溜勢遂於今年三月初十日開工上自社甲公隄起經駝灣下至黃新莊止隄長七千四十丈加培底寬七丈至七丈四尺頂寬一丈四尺至二丈築成內外兩坡高九尺至一丈二尺其間圍丁村險工一百十丈格外加培底寬九丈並於社甲公隄加築套隄九十丈駝灣中灣加築套隄八十丈均底寬五丈頂寬一丈高九

尺其緒口村團丁村連城村隄根舊有水坑串溝均卽填實王氏墳歸還村串溝密築土格二十五道布里橋以上北岸淤灘一段遮蔽橋孔阻遏河流挑去上坎長六十丈下坎長八十三丈寬五丈至十五丈深一丈暨將橋座加寬升高共需工費銀二萬餘兩又前修任邱千里隄所以分格河淀保衛田廬極關緊要上年大汛閒被衝刷今自白石碑起至里長灣止閒段湊長四千五百八十餘丈照舊式培成底寬五丈頂寬一丈高九尺並於險要處添做埽工一千二百十餘丈計需工費銀八千餘兩均令該道葉伯英駐工認真督辦隄皆層土層礮築厚一尺打成七寸錐不易入統於五月十八日工竣飭候補道史克寬前往量驗各工丈尺有盈無絀做法亦甚堅穩所需工費係於賑款內撥給招集附近窮黎以工代賑除截數開單彙報並飭實力防汛外所有修培益高

瀟龍河南隄酌挑北岸淤灘並修任邱千里隄工竣緣由理合附
片具陳伏乞

聖鑒謹

奏

李鳳苞仍賞花翎片

光緒七年六月初九日

再出使德國大臣兼肄業監督李鳳苞前因督率福建船政生徒出洋肄習期滿學成經臣照案奏獎請

賞戴花翎欽奉

批旨允准旋經吏部議駁以出使外洋不准保獎翎枝應片核請獎等因查吏部奏定章程內開軍營打仗出力始准保獎翎枝又出使外洋隨帶各員請獎照異常勞績辦理仍不得保獎花翎各等語似專指出洋隨員三年後回華給獎者言之李鳳苞監督生徒派往英法兩國鐵甲船及官民各廠學習駕駛製造之法周歷督查實心實力俾諸生學業日進凡兵船操防布陣迎禦之機以及電氣水雷鎗礮礦學藝學靡不研求理法確有心得於以開風氣而振武備論其勞績非僅一時打仗出力者可比而較之尋常

駐洋各員責任更自不同值此講求船學力圖自強之日非稍示優異不足以鼓勵人才況李鳳苞現充德奧義荷蘭四國使臣前

請

賞花翎業蒙

恩允若復行撤銷觀瞻所繫體統攸關擬請仍照原獎仰懇特恩賞戴花翎以昭激勸理合附片具陳伏乞

聖鑒訓示謹

奏

李鳳苞仍賞花翎片

光緒七年六月初九日

再出使德國大臣兼肄業監督李鳳苞前因督率福建船政生徒出洋肄習期滿學成經照案奏獎請

賞戴花翎欽奉

批旨允准旋經吏部議駁以出使外洋不准保獎翎枝應片核請獎等因查吏部奏定章程內開軍營打仗出力始准保獎翎枝又出使外洋隨帶各員請獎照異常勞績辦理仍不得保獎花翎各等語似專指出洋隨員三年後回華給獎者言之李鳳苞監督生徒派往英法兩國鐵甲船及官民各廠學習駕駛製造之法周歷督查實心實力俾諸生學業日進凡兵船操防布陣迎禦之機以及電氣水雷鎗礮學藝學靡不研求理法確有心得於以開風氣而振武備論其勞績非僅一時打仗出力者可比而較之尋常

駐洋各員責任更自不同。值此講求船學力圖自強之日，非稍示優異不足以鼓勵人才。況李鳳苞現充德奧義荷蘭四國使臣，前請

賞花翎業蒙

恩允。若復行撤銷，觀瞻所繫，體統攸關。擬請仍照原獎，仰懇特恩賞戴花翎，以昭激勸。理合附片具陳，伏乞

聖鑒訓示謹

奏

賞換花翎以示優異理合附片具陳伏乞
聖鑒訓示謹

奏

兵差報銷酌議章程摺

光緒七年六月初九日

奏爲查辦各屬兵差報銷酌議章程分別奏咨立案恭摺仰祈
聖鑒事竊直隸各州縣歷年供應各處征調遣撤過境官兵應需
廩給口糧馬乾車價房價並運送軍裝器械火藥糧餉等項業經
截至光緒四年十二月底止分年分起造冊奏銷在案其四年以
後應辦銷案擬請兩年彙報一次今查自光緒五年正月截至
六年十二月底止已由升任藩司任道鎔檢查各屬送到銷冊詳
細句稽分別准駁核實造報其中有應循舊章者有應酌量變通
者詳請奏咨立案前來臣覆核無異除咨戶兵工三部外所有應
行奏明立案事宜理合繕單恭摺具陳伏乞

皇太后

皇上聖鑒謹

奏

請將查辦各屬兵差報銷酌議應行奏明立案事宜繕單恭

呈

御覽

計開

一帶兵官弁屢給跟役馬匹等項應按品級照例核計但各屬冊報往往參差歧異若必逐一咨查不特輾轉往還有稽時日且各營或已遣撤或已改調更難查考擬請量爲變通除原營已有帶兵官弁銜名送到者仍核實辦理外其未送到者卽按各屬冊報以上下站比對其銜名參差者以最小之品級爲準其多寡不符者以最小之數目爲準毋庸咨取各原營銜名以歸簡易

一兵部奏定章程遣撤東三省察哈爾熱河密雲等處官兵如未經奏明咨回原處者車輛廩給概不支給惟近年遣撤官兵到境

總以糊口無資紛紛索取並有傷病之人情甚可憫勢難概不應
付且遣撤東三省官兵多有赴兵部請給護牌者州縣尤不能不
照牌應付應請凡遣撤東三省等處官兵如有兵部護牌飭令應
付者無論遣撤時曾否奏明俱准報銷以歸劃一

遵議鴉片釐稅事宜摺

光緒七年六月十六日

奏爲遵議洋藥土煙加增內地釐稅事宜恭摺仰祈

聖鑒事竊臣欽奉光緒七年五月初九日

寄諭左宗棠奏禁食鴉片請先增洋藥土煙稅捐一摺著南北洋大臣福州將軍各省督撫粵海關監督各就關口地方情形詳細體察將稽查徵收章程悉心妥議覆奏候旨定奪此事務在必行該大臣等當熟籌辦法期於大局有神等因欽此當即分行北洋各關道一體欽遵籌議在案竊維洋藥流毒甚深既難驟然禁止只可先加釐稅藉以稍濟餉需而煙價較增吸者或漸減其癮未始非徐禁示罰之意臣於同治十三年海防事宜案內業經議及惟釐稅加增太重恐致偷漏愈多亦須統盤籌計查洋藥係由印度先到香港然後分運進中國各口香港爲英國屬地中外奸商

卽於該處私相授受檢閱總稅務司開呈各關華洋貿易總冊同
治十二年至光緒四年所到香港洋藥每年八萬四千餘箱至九
萬六千餘箱運銷各口有稅者則止六萬五千餘箱至七萬一千
餘箱光緒五年所到香港洋藥十萬七千餘箱運銷各口有稅者
則止八萬二千餘箱實計每年香港私銷洋藥二萬數千箱除分
運新嘉坡舊金山各埠外餘皆不經新關不收稅釐而由沿海各
項民船漁艇零星潛運內地且多不入有關卡之正口各省濱海
之區蔓延萬餘里河港紛錯沙岸無垠勢難處處設卡節節防查
其偷入內地之後路徑四通八達或假日鑲車官差或附搭各船
行李狡謀詭計百出不窮卽使經過關卡亦不能逐人逐件一一
搜檢致生事端至賣放包庇之弊在所難免巡丁豈知大義洋藥
價值甚昂走私者卽偶被查出但分給時值十中之一二巡丁得

此已足償數月之辛金未有不縱放者更有豪強之徒糾合亡命執持兵器包攬越結幫興販關卡巡役單弱往往熟視而無如何自來私鹽最干例禁巡緝亦較嚴密然販私者無省不有或竟聚夥數十百人公然馱載到處濫賣拒捕兵役雖峻法嚴刑無以戢其心志蓋利之所在身命有所不惜也洋藥拆箱之後包件輕小取攜甚便隨身可以夾帶非私鹽笨重可比其獲利更厚於私鹽什倍百密一疏則騙釐者得計而報捐者向隅此杜絕偷漏不易之實在情形也凡事清其源則用力少而程功易截其流則需費多而收效寡洋藥偷漏之源實在香港惟難於該處稽徵不得不就各省自立章程以爲截流之助臣督飭津海關道鄭藻如查得津關進口洋藥從前每年可銷七千箱近因釐數稍加止有四千箱左右或三千數百箱緣山東河南與直隸昆運地而向皆由

津運往今則漸從鎮江煙臺分運天津銷數遂減至洋商運洋藥進口應先赴新關納稅將貨起存洋行鈔關不再徵稅凡華商買取者向赴洋藥釐捐局請領聯票逐箱秤驗照章每百斤完正加釐捐銀二十四兩地方善捐耗羨等銀八兩零其由津運赴內地聞崇文門按洋藥每包收稅銀一兩零此外如通州居庸關張家口固關大名府亦各有稅釐數目畸零並無大宗茲擬稅釐兩項每箱共加至一百五十兩除進口稅三十兩仍由洋商完交外其內地稅釐應合一百二十兩較前增數甚巨自應設法嚴防偷漏據鄭藻如詳稱擬由海關另設關棧洋藥進口立即起儲棧內勿再分存洋行以免散而無紀遇有華商購買先赴總口釐局交足捐項方准出棧惟關棧之設固能防弊尤貴使商應令總稅務司妥籌辦法應否知照各國公使俾免阻礙由總理衙門察酌辦理

至棧租一切與洋商無涉惟火險須洋商自保所有口岸轉販洋藥之華商字號擬令先領部帖方准開設部帖由關道核給每張令繳費銀五百兩十年一換既須領帖又重其費庶開設較少稽查較易並令五家聯保一家偷漏四家同罰其餘行戶及舊日號商現未領帖者一概不准私販洋藥上煙犯者全貨充公該商出資領帖利歸獨擅遇有私販自必尋蹤稟舉亦是助局卡之耳目其山沿海各口岸星偷進者擬酌設小輪船二隻專在海面巡緝並飭近海州縣營汛出示曉諭協同稽查儻有私帶洋藥進口被人指報者擊獲後全貨充公以其半賞給指報之人不必再科私運之罪以免挾嫌殺害惟海面攪裝之船隻內地私囤之鋪戶一經查獲必予重懲州縣營汛如能緝獲私販洋藥積至一百斤以上者記功一次積功五次奏請議敘十次准保升階升銜以資鼓勵

勵至三聯印票係爲互相比對而設稅務司專管口岸之稅不
內地之釐既於總口設釐捐總局應即由總局刊發三聯票以一
聯留局存根一聯彙送總理衙門一聯給華商爲已完內地稅釐
驗據貨到所銷之地將票呈官查收仍申送總局備核此擬洋藥
進口稽查防弊之辦法也洋藥惟海關有一定稅則其餘內地稅
釐各省輕重不一若照左宗棠所擬加增捐數必須各省議定統
歸一律並俟奉

旨後定准日期南北同時開辦勿使有多寡遲早之分庶免一口
獨重奸商趨避而餉源立竭至天津所收洋藥釐金向供海防練
軍兵輪船薪糧及地方籌舉之用本已入不敷出其業文門通州
各處亦藉稅釐以濟公需今統在總口捐交任其分販內地概不
重捐則凡向有釐稅之處進款全無必至辦公竭蹶擬此後洋藥

進口除海關每百斤收稅銀三十兩外應按總口釐局所收之數分作十成以六成劃補天津從前收款解交津海關庫仍爲軍餉船糧善舉等用其由津分販內地者如係運經本省向有稅釐地方應按該處向來洋藥百斤徵銀若干照數劃出由局按月移解濟用別省稅關釐局不得援請劃解除分別劃交各處及巡緝火輪關棧局用經費外其餘存候捐撥或解部充餉此洋藥加徵釐捐須各省統歸一律及就津口收數分劃應用之辦法也天津土煙無多稅釐收數甚少每年不過一二百兩或三四百兩其運銷各州縣者皆不入津境各路土煙價亦不一茲就天津售價計之最貴者山西所產每百斤值銀三四百餘兩其次山東河南奉天所產每百斤值銀三百兩上下又次四川所產每百斤值銀一百餘兩若就價值之高下遞分稅釐之等差實開滋弊之端今擬不

分何處出產統照洋藥內地稅釐之數減成徵收土煙無進口之
稅暫按一百二十兩三分減二定爲每百斤共徵稅釐銀四十兩
此口徵則彼口免彼處徵則此處免完過稅釐之後領有執照無
論運往本省何處均不重徵蓋土煙路路可通人人可帶更屬防
不勝防捐數稍減或偷漏較少且土煙之毒究比洋藥爲輕而民
財亦不外耗儼將來洋商無利可圖洋藥漸不來華再增土煙稅
釐益加厲禁尙未爲晚所有稽查防禁事宜應酌照洋藥辦理惟
直隸地方平坦遼闊頭頭是道斷難徧設局卡徒糜不貲之費轉
添無事之擾只有擇要責成地方官如晉豫東奉入直要道卽責
成該管道府督同州縣就近認真經理如能緝獲私販一體記功
給獎此土煙擬加稅釐稽查防禁之辦法也總之加捐易辦偷漏
難防洋藥來自外洋洋人利在毛銷必多方以撓我查禁之法土

煙產自各省官役力難徧及必多方以求其繞越之途臣熟籌辦法但盡其力所能爲未敢謂確有把握至臣所轄山海東海兩關現尙未據覆到該兩省情形雖未盡同大致無甚區別如將來南洋各口一律照加該兩口自可酌照直省章程會商核辦其藥釐內尙有解津之款仍應核數劃解除將津海關道擬設關棧稽查大概章程咨送總理衙門查核外所有遵議緣由理合恭摺由驛覆陳伏乞

皇太后

皇上聖鑒訓示謹

奏

議設洋藥公司片

光緒七年六月十六日

再近有粵商何獻墀等擬於香港設立洋藥公司據瓊州鎮總兵彭玉翰林院編修鍾德祥先後代呈節略大致謂該商等擬集銀二千萬圓以作公司資本先與印度妥訂章程合同每年限定運赴香港洋藥若干箱每箱價值若干統歸公司承買繳價再由該公司發售中國各口不准印度洋藥徑運他處俾與他人如於定數外尙可多銷再由公司寄信印度添運該公司於賣出後每箱統交中國稅釐銀一百餘兩四月開適有英官沙苗奉派前來中國查考各口每年售銷洋藥數目何獻墀等與之相見議論創設公司之事沙苗允爲留意謂若中國與印度肯照承辦再行函知各等語該商等遂屬彭玉轉言於臣鍾德祥假旋游粵素悉洋情深明大局亦將此意函達前來臣維印度洋藥之來中國必須先

到香港而私銷即在該處爲多按總稅務司開呈總冊每年私銷者約有二萬數千箱以現議每箱稅釐百五十兩計之是每年偷漏銀已三百數十萬兩將來南北各口驟加捐數難保各省奸商不徑赴香港私運至沿海無關卡之處灑賣私銷則成本愈輕獲利愈厚所謂爲淵駸魚爲叢駸爵患生於所備之外卽法令有時而窮誠能於香港設立公司專歸公正股富華商經辦仍聽官主持一切務使全綱在握毫無偷漏不但歲餉頓增數百萬而各省口岸內地之局卡及各路之巡船均可裁撤節省糜費尤屬不少聞何獻琛等多係殷富久在粵省香港一帶貿易熟悉華洋商情其他富民聞有此舉亦願出資附股蓋買賣洋藥統歸公司咸知有利無害是以集本不難其應交釐稅則明立保結嚴定章程特派大員前往監收按照各省關稅釐收數分別批解具有盈餘

提撥部庫亦尙無慮虧缺惟香港爲英國屬地有該國總督駐紮
必須該商等先與該總督及印度總督熟商俾英廷君臣均無扞
格如能允其照辦給予憑約勿任洋商爭奪阻撓偷運私售此議
乃可有成事既關乎大局權非自我獨操英員沙苗前曾過津謁
晤旋卽回國未知該國及印度部主見究竟若何臣於彭玉展

覲回粵時已屬其傳諭該商等自行與英官設法疏通俟有定議
切實稟知再咨商總理衙門暨兩廣督臣核酌妥辦茲因議加各
省洋藥稅釐誠恐偷漏愈多終致有名無實不得不就彭玉鍾德
祥之論聊備一說其成否尙未敢預定除先咨總理衙門主持商
辦外合再附片瀝陳伏乞

聖鑒訓示謹

奏

創設公司赴英貿易摺

光緒七年六月二十日

奏爲招集華商創設公司專赴西洋貿易以立富強之基恭摺仰祈

聖鑒事竊查光緒六年十月祭酒王先謙奏請令商船出洋片內聲明船政大臣黎兆棠前議創立宏遠公司運貨出洋請咨商舉行湊集商股作速開辦欽奉

寄諭目下情形能否及此將來如何漸次開拓興辦著妥籌具奏等因旋經臣等先後覆陳擬暫就招商局現有輪船酌量試辦逐漸推廣並緘屬黎兆棠請其勸諭粵商設法倡導茲准黎兆棠咨據廣東職員梁雲漢劉紹宗梁紹剛等稟稱泰西以商立國商務之盛衰卽國勢強弱所由判凡有益商務者必竭全力以圖之年來日本步趨泰西亦四出通商以爲利國利民之本中國地大物

博商務爲四洲之冠洋人視爲利藪紛至沓來有可以從中圖利者鮮不多方挾實由彼來而我不往也卽有到金山古巴祕魯等處者亦僅貧民傭工並無殷商前往似未足以立富強盛業現已招集殷商湊成鉅款名曰肇興公司擬往英國倫敦貿易以爲中國開拓商務之倡該員梁雲漢在粵東總理劉紹宗梁紹剛往倫敦管事不領公帑不准洋商附股一切進出口貨完稅章程請照洋商一律辦理以昭平允惟事屬創始必須官爲維持請由通商大臣給諭前往並轉咨中國駐英大臣隨時主張俾得與各國在英商人一體優待等情請奏前來竊維西洋富強之策商務與船政互相表裏以兵船之力衛商船必先以商船之稅養兵船則整頓通商尤爲急務邇者各國商船爭赴中國計每歲進出口貨價約銀二萬萬兩以外洋商所逐什一之利已不下數千萬兩以

十年計之則數萬萬兩此皆中國之利有往而無來者也故當商
務未興之前各國原可閉關自治建風氣大開既不能拒之使不
來惟有自擴利源勸令華商出洋貿易庶土貨可暢銷洋商可少
至而中國利權亦可逐漸收回前此招商局輪船管駛往新嘉坡
小呂宋越南等埠攬載近年和眾美富等船分駛夏威仁國之檀
香山美國之舊金山載運客貨究止小試其端尙未厚集其力英
國倫敦爲地球內通商第一都會並無華商前往黎兆棠志在匡
時久有創立公司之議盡心提唱力爲其難現既粗定規模自當
因勢利導期於必成惟草創之初能否獲利尙無把握祇有官商
上下合力維持以期漸推漸廣所有該公司出進口貨物在中國
通商各口岸應准照洋商一律辦理其出洋後沿途及抵倫敦一
切貿易章程應得與各國在彼商貨一律辦理臣等擬卽咨商駐

英大臣曾紀澤隨時設法主持保護俾該商等遇事有所稟承並
給諭與該公司仿照泰西通例五年之內只准各處華商附股不
准另行開設字號免致互相傾跌貽誤大局除俟開辦後各口分
支設棧及未盡事宜隨時酌核咨行查照外所有招集華商創設
公司前往英國倫敦貿易緣由謹會同南洋通商大臣劉坤一船
政大臣黎兆棠合詞恭摺具陳伏乞

皇太后

皇上聖鑒訓示謹

奏

王德均暫緩赴吉片

光緒七年六月二十日

再臣承准軍機大臣字寄六月初一日奉

上諭吉林地方緊要現在整頓邊防所有製造軍火修築礮臺均屬目前要務吳大澂擬於省城開設機器製造洋藥彈子等件卽著照所請行片奏請暫調天津機器局道員王德均來吉差委著李鴻章卽飭該員前赴吉林等因欽此遵卽轉飭候選道王德均知照旋據王德均稟稱凡事創始維艱製造門類紛繁尤難罄述惟有緊要數端不能不爲代籌者一須因地制宜吉林水道不能直達陸路運重輿費稽時一機器重過數千斤者卽難運行吉省購器應擇輕小之件爲宜一須預籌經費滬津各局皆有指定鉅款積久經營規模始見宏敞吉省無此物力器料驟難全備只可酌量購用如足踏手搖及汽爐之類僅備隨時修理軍械他如

儲料造藥建廠用匠各事宜已會同津海關道鄭藻如及機器局
員酌擬辦法開摺寄達吳大澂察核並稱由津局就近照料較易
設法卽親自前往亦不過如此辦理等語臣查王德均老成練達
研精機器經臣委辦行營製造局十有餘年用費較他處節省而
造成各件亦蔚然可觀蓋以該局與機器局互相附麗諸務均可
通融而王德均又能精心學畫也誠如吳大澂所稱爲臣處得力
之員未能久離津局因思吉林經費旣形支絀運路又極艱難經
始之初尙難倉猝就緒王德均所擬各條切中事理吳大澂循照
籌辦當可漸入門徑況吉林運器購料必由天津王德均在津代
籌儘可隨時照料俟各種緊要機具物料稍備再令王德均等選
派熟習委員工匠前往不致誤事除咨明吳大澂查照外理合附
片覆陳伏祈

奏
聖
鑒
直

職官句串洋人張詐摺

光緒七年六月二十日

奏爲審明職官句串洋人駕空強詐華商巨款按律定擬恭摺仰

祈
聖鑒事竊查前據津海關道鄭藻如稟報職官吳樾等句串洋人
米若士等駕空強詐京都裕豐金珠店銀六萬兩一案經臣將吳
樾等

奏參革職卽交津海關道鄭藻如天津道吳毓蘭督同天津府知
府宜霖認真提究茲據審明擬議具詳前來臣親提吳樾何漣及
原告段盛藻逐一核訊緣吳樾卽吳蔭庭籍隸浙江鄞縣報捐知
府銜同知保舉花翎分發直隸試用何漣卽何鼎壽又名夏珍籍
隸浙江上虞縣報捐花翎候選同知保加四品銜何漣前領浙江
候補道朱其昂成本於京津上海廣東開設華裕豐匯銀票號與

原任江蘇糧道英樸在京所開之裕豐金珠店曾有銀錢往來嗣因朱其昂病故本銀提盡裕豐金珠店即不與交易其原存華裕豐票號銀二萬六千兩經裕豐掌櫃人段盛藻設法取回何連因段盛藻取回存款致華裕豐益難周轉陸續歇業遂深恨段盛藻意圖陷害在京涉訟未結此光緒六年七月以前事也適有廣東華裕豐未銷廢票五紙計銀六萬兩何連起意借此訛詐並欲借洋人之勢控追遂與吳懋商量吳懋即為其設謀句串在津開設裕順和洋行之俄人米若士將此廢票捏作華裕豐欠裕順和洋行實在銀款又以裕豐金珠店與華裕豐票號前有往來指為同一東家謂華裕豐倒閉應由裕豐給還又檢出英樸前因兩號通融銀兩致蘇州人張芝芳之信一併交給米若士令米若士冒認張芝芳以為向英樸家索討憑據希冀英樸家屬與段盛藻見有

洋人畏付銀彼此分贓米若士旋遣英人恆德生於上年十二
月持票進京討要領有俄領事官韋貝印據段盛藻未與見而其
鋪夥言此係廣東華裕豐之票與裕豐金珠店無涉恆德生本未
知申詳細情遂帶票回津本年正月段盛藻有事來津借住候補
同知鄭煥寓內何漣等告知米若士復遣恆德生往索段盛藻仍
未見而旋即回京行至津郡北門外即被米若士帶同跟人邵姓
冒充俄國領事公差將其攔回段盛藻情急赴津海關道衙門呈
控該關道鄭藻如函詢俄領事官韋貝據覆廣東華裕豐應付天
津裕順和洋行銀六萬兩有票爲據須由京號裕豐金珠店掌櫃
段盛藻付給請飭段盛藻與洋商會面妥商該關道訪係華官串
詐隨提到何漣吳樾並搜獲吳樾親筆信據究出實情稟經臣將
吳樾何漣

奏參革審復在吳樾寓所起獲何漣親筆信件及米若士洋文信件內有事後米若士應得銀一萬兩之憑據並據吳樾供明米若士知係廢票等語經臣添委通曉洋文洋語之候選道馬建忠提同洋商與領事官會訊乃俄領事韋貝初則託詞延宕繼因吳樾不肯指證米若士知爲廢票韋貝卽不再訊其爲該領事袒護洋商已可概見事關中外交涉應將米若士等受屬詐銀希圖分贓一節另由關道與領事爭辦核辦其吳樾何漣二犯供證已甚確鑿應卽擬結查例載兇惡棍徒屢次生事行兇無故擾害良人所共知確有實據者發極邊足四千里安置凡係一時一事實有情兇勢惡者亦照例擬發等語此案何漣因挾裕豐金珠店不與通融之嫌輒敢以廢票圖詐數至六萬兩之多吳樾竟爲設謀勾串洋人冒認欠項恐嚇強詐查吳樾親筆致何漣信內謂已託洋

人安頓妥當由伊先給洋人盤費進京追討隨後用洋官公文向
總理衙門控追屬何漣務須照伊前信說法萬勿改口伊當竭力
周全斷不使何漣喫虧並謂洋人事件到總理衙門雖值元巨亦
是要辦令何漣放心何漣親筆致吳樾信內令吳樾託洋人找一
箇假芝芳造一箇洋行招牌要米若士有香港認識洋行以備總
理衙門行查並謂廣東帳簿已經做好不怕總理衙門查帳又言
英樸家及段盛藻非做到十分嚴緊不肯付銀務限總理衙門五
日多則十日速向英樸家及段盛藻要銀等語雖賊未入手而歷
次商謀各節實屬驚空擾害兇惡狂妄膽大已極此風斷不可長
該兩犯皆情無可貸厥罪惟均應將革員吳樾何漣俱依棍徒擾
害例擬發極邊足四千里安置吳樾係到省候補職官應發黑龍
江充當苦差何漣以商人捐職候選尙係常犯應定地解配杖一

百折責安置照例刺字冒充公送之華民邵姓飭緝獲日月結其餘牽涉人證或因向何連討契帳目被何連愚弄或本屬無干卽何連信內所稱段盛藻騙銀一節亦無其事應免提質以省株連廢票五紙業經追出句銷存卷除錄具各供并鈔信件分咨總理衙門刑部查照外所有審明定擬緣由理合恭摺具

奏伏乞

皇太后

皇上聖鑒訓示謹

奏

修竣津城濠牆摺

光緒七年七月十五日

奏爲津郡城外牆濠關係一方保障現經官商捐修完竣恭摺仰

祈
聖鑒事竊天津郡城規模狹小城內民居無多且井少水鹹難供
汲飲是以富家大賈多在城外其東北關廂一帶尤爲精華萃聚
必須嚴設關防用資保障咸豐九十年間前親王僧格林沁已令
官商捐修外城濠牆同治七年捻逆竄至兵民協守甚資其力迨
十年十一年疊被大水衝塌已成平地於去秋商飭長蘆運司
如山津海關道鄭藻如天津道吳毓蘭會同詳細勘議集捐興辦
應仿舊址酌加展寬從新修築素土圍牆一道計長六千七百餘
丈高一丈一尺頂寬一丈二尺底寬三丈六尺至四丈五尺牆頂
靠外加築垛牆一道高四尺頂寬二尺底寬四尺牆腳一二丈外

挑濠一道計長六千九百餘丈而寬三丈至八丈底寬一丈至五丈深五尺至九尺卽以挑出之土築牆有不敷者於他處取土加築又土牆周圍建營門十四座兵房二十一間以便看守啟閉牆上修土礮臺二十八座以扼形勢牆裏開馬道三十四條以便登陟牆外建木橋五座以通行人牆根置水關六座涵洞六座石閘一座以宣洩水勢卽將通工分作三大段北運河西岸至南運河迤南爲一大段南運河迤南至海河西岸爲一大段海河東岸至北運河東岸爲一大段由如山鄆濠如吳毓蘭各督府縣委員雇募民夫分段承辦去冬未凍以前先將濠牆土工趕築就緒今春開凍以後接辦堆牆礮臺營門兵房馬道橋閘於六月初十日一律竣事臣卽親往督同道員朱福榮萬國順周歷逐細驗收牆臺均係層土層礮築厚一尺打實七寸濠身深廣水關用外洋鐵鈔

木作成櫟柱堅結異常其餘各工亦均穩固經久所需工費樽節
動支計共用銀七萬九千四百餘兩如山鄭濠如各捐銀一萬兩
吳毓蘭捐銀一千兩天津府知府宜霖捐銀六百兩天津縣知縣
郭奇中捐銀四百兩長蘆鹽商公捐銀二萬兩其不敷銀三萬七
千四百五兩九錢六分二釐已於加增洋藥釐捐項下撥補竊維
津郡爲海疆重地城外商戶民居日益繁盛勢難聽其四通八達
毫無屏蔽臣屢擬修復圩牆苦於經費無出今幸官商合力通籌
已將牆濠三十餘里剋期告竣更於扼要之處增築礮臺以相策
應設有緩急洵足禦外侮而固人心又相度地勢高下建置水關
閘座涵洞不特宜洩潦水而環濠民田亦可就近引灌洵於地方
形勢民間生計有裨現已飭派弁兵常年看守遇有坍塌淤墊仍
由該司道各按原辦段落自行籌款認修若值交卸應驗明各工

是否完善令接任司道出具收管照章修辦務使歷久不廢永資捍衛除蘆商捐款係通綱商人分作五年按引零星攤繳無庸議獎辦工出力委員由臣酌給外獎外惟該司道等倡捐銀兩力成要工實屬保衛地方盡心民事如山郊濠如各捐至一萬兩之多尤堪嘉尚擬請

旨敕部將該司道府縣分別從優議敘以昭激勸此項工費大半係屬捐款且辦理甚爲核實並請免其造冊報銷俾省繁費所有津郡城外牆濠現經官商捐修完竣緣由理合恭摺具

奏伏乞

皇太后

皇上聖鑒訓示謹

奏

飛虎船救護壞船請獎片

光緒七年七月十五日

再上年四月開派蚊船兵船出洋操巡由大連灣駛往海洋嶼鎮南船底誤觸暗礁情形危險總教習葛雷森親督各船弁兵並飛虎船水手設法救護扭帶進口業經臣奏奉

俞旨賞給葛雷森二等寶星並將鎮南船大副李和傑勇李貴等分別獎敘在案臣因飛虎輪船已回粵海關當即劄行總稅務司赫德查明該船出力員弁酌請獎勵茲據赫德呈稱當鎮南觸礁之時飛虎船管駕官哥嘉開警立派葛雷森乘小艇先往自督飛虎船隨行既知鎮南船底穿挂於礁石之上不能轉動哥嘉與葛雷森商定將鎮南船中應行啟閉料理各事妥爲布置一面督飭水手掘出艙水待潮信漸至哥嘉即回飛虎用繩扭帶鎮南駛行不遠繩忽中斷哥嘉另備繩索拴繫預飭大副章師敦在進口要

路懸燈照耀始得進口停泊厥後在海洋島暫爲修理遂獲送赴
煙臺則哥嘉屬葛雷森專主其事此外最出力者尙有管輪副堪
士耶大副章師敦水手首領史類白皆視鎮南事爲己事奮不顧
身齊心救護可否酌請給獎等情前來查稅關巡船代北洋礮
船出力赫德與該船員弁等皆視爲分所當爲並非望格外得獎
惟值此整頓海防之際各洋將能爭先效命非酌予優獎不足以
示鼓勵所有前管駕飛虎船遊擊銜哥嘉擬請

賞給頭等寶星並加參將銜管輪副堪士耶及大副章師敦擬請

賞給二等寶星水手首領史類白擬請

賞給三等寶星並由該總稅務司普加飛虎船水手人等一月薪

水銀兩藉資激勵理合附片陳請伏乞

聖鑒訓示謹

卷之四十一

家編四十一

四

籌濟吉林機器片

光緒七年七月十五日

再吉林邊防緊要所需洋藥及後膛子彈等件業經吳大澂奏准於省城開設機器廠製造並擬暫調天津製造局道員王德均赴吉臣以王德均研精機器為臣處得力之員未能久離津局吉林運器購料必由天津

奏明飭王德均在津代籌隨時照料緊要機具物件稍備再派熟習委員工匠前往在案竊維吉林創設機廠理大物博經費甚形支絀應需機器勢難全在西洋訂購且恐緩不濟急查上年四月臣議擬吉林設廠創辦小輪船請調廣東道員溫子紹製造案內欽奉

諭旨將粵海關監督倭代購神機營設廠之機器選擇合用者由海道運至奉天營口再由陸路運吉溫子紹暨隨帶工匠機器

赴吉川資考該督撫監督籌給等因欽此旋因溫于紹未能前往
機器仍在廣東今吳大澂設廠製造軍火情事相同器具亦可通
用應令將前項機器運解應急其餘應添各件容飭王德均察酌
代購將來如經費較允厥務逐漸開拓再由臣隨時緘商吳大澂
籌造輪船俊啟現已任滿離粵應卽由兩廣督臣張樹聲查明所
存各種機器委員迅速儘數解津交王德均驗收分別轉解吉省
其自粵至津運費仍請遵

旨由該省籌給除分咨張樹聲吳大澂查照辦理外理合附片具

陳伏乞

聖鑒謹

奏

李朝儀政績摺

光緒七年七月十五日

奏爲已故順天府尹歷官政績懋著賢勞請

旨宣付史館以勸循良恭摺具陳仰祈

聖鑒事竊維求治以察吏爲先課吏以得民爲本

畿輔爲首善之區徭重政繁甲於天下非周知利病不能勤恤民

依非久歷艱難不能諳通治術查有已故順天府尹李朝儀貴

州貴筑縣人由道光乙巳科進士發分直隸知縣累膺遷擢先後

官

畿甸者二十七年潔己勤民始終一致臣請將其歷任政績爲

聖明縷晰陳之李朝儀初任平谷饒陽三河等縣升大興縣知縣

署南路廳升東路廳同知署順德廣平二府升大名府知府其在

饒陽巡緝四鄉盜風斂戢在三河建置書院文教蔚興在南路廳

創辦民團在東路廳督捕蝻蝻凡親民應爲之事無不悉心體察
實見施行其在通州值咸豐庚申之役外侮憑陵土匪蠭起李朝
儀自天津防所星夜馳歸聯紳董除奸宄內修城守外訶敵情通
州賴以不擾有

賞加道銜之

命其在順德以民兵五百禦捻匪萬人於沙河境上相持一晝夜
援軍至而賊遁防堵撫輯保全實多有

賞戴花翎之

命並經前科爾沁親王價格林沁督臣劉長佑奏報在案同治七
年十月前督臣曾國藩下車伊始振新吏治薦舉賢員以李朝儀
居首謂其明練耿介表率有方辦理地方事宜不懈弛亦不苛刻
士民稱之欽奉

諭旨該員才具政績均有可觀實爲直隸出色人員深堪嘉獎飭令益加策勵勉爲循良等因欽此旋蒙

特擢永定河道永定素稱難治遇澇輒潰李朝儀在任十年籌備料採搶護險工請修金門閘及次壩分洩汛漲每遇狂瀾驟至董役於深宵風雨之中員弁兵夫無不爭勸慎核官帑裁減陋規將道署公用詳定章程至今遵守臣與李朝儀共事最久見其積勞求退必以公義私情相勸李朝儀力圖報稱亦遂不忍言歸光緒三年三月奏署直隸按察使五年補授山東鹽運使上年晉秩京尹方將隨事整釐盡心規畫用副

朝廷倚畀之隆不意年力未衰遽以憂勞病故身後蕭然賴京外同官賻助始得歸櫬中維自古循吏不必皆有赫赫之功惟其久任一方知民疾苦當時服其教令後世傳其設施李朝儀廉

明正直爲僚屬士民所共知核其一生治行不離直順兩屬而公
論所在久而益彰既邀

褒勉於

溫綸宜荷昭垂於史策合無仰懇

天恩俯准將已故順天府府尹李朝儀歷官政績

宣付國史館立傳以示楷模而資觀感出自

聖主鴻施爲此恭摺具陳是否有當伏乞

皇太后

皇上聖鑒訓示謹

奏

裁遣靈營片

光緒七年七月二十九日

再臣欽奉光緒七年五月十四日

寄諭鮑超各營駐紮樂亭一帶著裁撤步隊十一營馬隊二營派員分起管帶回籍妥爲遣散該勇丁籍隸湖廣程途較遠當仍由輪船行走著李鴻章劉坤一卽爲豫備知照鮑超飭令各營陸續起程應需輪船經費著李鴻章籌款應付其軍火器械派員點收存儲備用等因欽此遵卽札飭招商局道員唐廷樞等妥速籌備輪船俟鮑超派定裁撤何營暨赴部領回餉項知照開拔日期卽分起駛赴撫甯縣洋河口候裝運至漢口卸載並令署永平府知府陳慶滋及各該州縣妥爲照料起行於洋河口多備民船以便剝運片派道員楊嘉善與陳慶滋點收軍械馬匹旋准鮑超咨商一切卽據招商局陸續派往海定口新海晏永清興盛利連鎮東

輪船七號利運鎮東兩船裝運一次海定等五船裝運兩次自六月十五日起至七月十四日一律裝竣均赴漢口交卸沿途安靜行走並未滋事應需輪船經費飭令樽節開支由臣於北洋海防經費內籌款墊付其洋河口剝運民船亦核實給價由藩司彙案覈銷至軍械挑留分給未撤各營外其餘劈山礮洋鎗腰刀長矛等械照單點收解津存儲又馬匹除陸續倒斃實收四百匹多已口老疲瘦只能就地酌量變價以資農民耕作之需所有裁撤靈軍十三營備船裝運完竣緣由理合附片覆陳伏乞

聖鑒謹

奏

巴西增刪條約摺

光緒七年閏七月初八日

奏爲巴西使臣商請增刪原訂條約經臣酌量相機議辦恭摺具
奏仰祈

聖鑒事竊臣於光緒六年六月間避

旨與巴西國使臣喀拉多穆達議立通商條約已於上年八月初
一日定稿繕本畫押鈐印專摺具

奏並將條約正副本及照會稿分送軍機處及總理各國事務衙
門備查在案臣因從前中國與各國立約多倉猝定議又未諳西
洋通例受損頗多是以與該使往復駁辨按照各國約章酌量變
通冀可收回權利亦乘巴西有求於我先就一國稍倡其端將來
各國續來議約即可逐漸設法轉移該使等遵允畫諾喀拉多於
去年九月出都穆達齋約回國方謂條約已定計期即可互換詎

本年三月十九日喀拉多自滬至津據稱接伊國電報禁販洋藥已允照辦請即添人條規並酌擬增刪原約各節如第一款與別國民人句請改爲與相待最優之國民人字樣第十一款案內華巴民人有未甘服應聽照會覆訊一節恐兩國民人藉此拖延滋訟案難了結務求准刪臣以已定之約向不能於未換以前片議刪改惟彼國既願將禁販洋藥添入條款似於中國有益該使復聲請原約第三款領事官不得以商人兼充擬改作商人亦可兼充第四款游歷印照須照會關道請領擬改照各國條約仍由領事發給地方官蓋印臣查當日訂約此二款原爲防弊起見斷難允改其第一款第十一款無關緊要字句未始不可酌刪喀拉多旋即回滬五月杪該使復派繙譯官微席葉來謁謂穆達回國後議院查出原約第十款內華人有本身犯案或牽涉被控凡在巴

人公館寓所行棧商船者均聽中國官派差徑往拘傳此與各國
條約照會領事官交出者顯有區別去冬美國修約在巴國訂約
之後美約並無此議巴西礙難獨遵力懇改照布約第三十二款
以全巴國體面等語臣思華民在各行棧商船傭工者每恃洋
人爲護符遇有犯案不聽傳喚雖行文領事飭交往往底縱成習
由於前此立約未妥一時驟難更改以致流弊甚多今欲藉巴西
議約漸收中國自主之權於約內聲明派差徑往拘傳具有深意
堅不允行微席萊去後喀拉多函託津海關稅務司德維琳屢來
懇商均以嚴詞拒絕七月二十日該使自滬來津面遞辨論第十
款節略一紙謂出自該國朝廷之意若不准改必將該使調回另
行派員來華從新議約情詞甚爲迫切臣反覆開導該使總謂此
條不改全約俱作罷論該國絕不肯互換並引中俄新約改訂爲

辭如堅執不改卽索一答覆節略回國覆命臣於閏七月初一日擬具答覆四條節略面交臺未鬆口該使遂於初二日來署辭行勢將決裂臣因思巴西已成之約照西國各約挽回不少今又允將禁販洋藥添入約款洵於大局有裨彼旣出於甘讓我亦當略爲酬報所議增刪各節尙覺無甚關係惟第十款末節稍重若遽改照各國條約華犯由領事交出何能漸收自主之權若全不通融如滬津等處各國租界早定巴人來必借寓僑華官徑往拏犯巴官雖不敢阻他國領事必出頭阻抗則華巴兩面均有關礙且公館商船皆有巴西國旗號巴人可以自主亦未便不知照巴官徑往拏辦况第三款已聲明領事等官必須奉到中國批准文憑方得視事如領事官辦事不合可將批准文憑追回此層最爲緊要關鍵儼巴官庇縱華犯尙可照約追回文憑是操縱仍屬在我

謹將巴西使臣喀拉多面遞辨論第十款末節四條節略並答覆該使臣四條節略照繕清單恭呈

御覽

巴西使臣喀拉多面遞節略

兩國條約載有巴國民人遇有詞訟案件並不歸中國地方官審辦僅歸其本國官員辦理故此巴國人民房屋棧房商船等處中國官役不得強入一事不過係條約上之意推而論之巴西國家之欲如此者不過欲巴國民人之在中國者比之凡與中國有和約之國其看待民人地位不得較輕

又巴國無論何國民人在巴國所沾之利益已准中國人民一體均沾然中國看待巴國人民欲有異於看待凡與中國和約之國之人民未免有辱於巴國此生事之根也不如先時除去以保將

來永遠和睦

又中國與他國公同立定條約其商訂之地無論或在天津或在中國京都中國之意宜歸一律然德國及美國近修條約已奉

大清國

大皇帝允准內中並無中國官員憑其差役至該國民人房屋查拏犯人一款況且美國修約在巴國定約之後明顯中國所准他國得沾之利益不准巴國一體均沾則中國未免於公平有礙矣又中國欲禁止販運洋藥一事乃緊要大有關係之事巴國知此事有益於中國立即允許是巴國大有功於中國也則第十款內所載凡在巴人公館寓所行棧商船等處者均聽中國官員派差徑往拘傳審理等語亦可除去矣

答覆巴西節略

似未便因擊犯一事致將全約所得便利盡行廢棄遂與該使商
改由地方官一面知照領事官一面立即派差協同設法拘擊不
得庇縱稍留等語較各國約款文義稍變蓋由地方官派差仍不
失中國自主知照領事官則巴國體面亦無所礙該使允卽照改
並將禁販洋藥照美國新約全文添作第十四款共成十七款此
臣與巴西使臣喀拉多酌議稍改原約之情形也喀拉多已於初
三日回滬據稱電覆本國俟接回信於三禮拜後來津謄寫約本
片與訂期畫押專用喀拉多一人銜名其前次已定條約正副本
卽作爲廢紙事關改訂條約於原議微有參差而大致無甚出入
亟應先事具

奏謹照鈔巴西改訂約款分別黏簽貼說並照錄該使喀拉多面
遞節略及臣答覆節略恭呈

御覽除緘商總理衙門外所有巴西使臣商請增刪原約經臣酌
議辦理緣由謹繕摺由驛據實具陳伏乞

皇太后

皇上聖鑒訓示遵行謹

奏

一約內訂明巴國民人案件並不歸中國地方官審辦可見中國絕未輕待巴人至第十款載中國民人本身犯案是專指中國人犯中國法者言之中國有自行拘傳審理之權與巴人毫不相涉實無所謂輕待也

一巴人來中國通商中國必視同凡有和約之國人民無異約內第一款已載明與相待最優之國民人同獲恩施利益至在行棧商船傳人與否所傳乃係中國之民人無關於巴國商務如以行棧商船聽中國自傳本國犯罪之人爲有辱巴國則在行棧商船臧匿中國罪人巴國先自取辱矣巴國肯列此條足見與中國倍敦友睦何至因此生事

一各國每遇修約之期均係擇要先修不能將各條一時全改德美兩國近來修約雖未議及此節日後再遇修約未必不載入約

內況美國此次在總理衙門修約專爲華工一事而來因及洋藥商稅等條其餘尙未全改蓋議修多年已成之約與創立向來未有之約情形本自不同卽以禁運洋藥而論貴大臣上年不肯於約內載入此條以爲多有窒礙而美國竟肯首先載列則將謂美國自棄其利益乎如美國亦謂販賣洋藥係中國所准他國得沾之利益必欲一體均沾此條恐終無列入約內之日矣運洋藥爲有礙中國民生之事美國肯列約嚴禁洋商行棧徑行傳人爲有關中國政令之事巴國不肯照行較之美國之待中國恐亦未可謂公平也

一禁販洋藥一條上年貴大臣未卽允定今見美國列入約內始允照添並非立即允許此次議定盡押之約本大臣已准通融改易不少與禁販洋藥一款亦足相抵未便再將第十條末節刪除

請催粵海關欠解海防經費摺

光緒七年閏七月初八日

奏爲粵海關應解北洋海防經費積欠四結之多請

旨嚴催以警玩泄恭摺仰祈

聖鑒事竊粵海浙海等關徵收四成洋稅招商局稅前經戶部會同總理各國事務衙門奏定章程除額撥軍餉外卽儘數分解南
北洋專作海防經費必須按結解清不准挪移短欠又奉光緒六
年六月二十七日

上諭北洋防務極關緊要需餉尤殷各省關應解經費著嚴飭趕
緊撥解大批濟急釐金必解足八成關稅必照章提前儘再延欠
卽著李鴻章覈參照延誤京餉例議處等因欽此節經咨行欽遵
在案近來關稅一項江海浙海等關尙能依期報解惟粵海關自
上年五月二十四日第八十結起至今年六月初五日第八十三

結止徵收四成洋稅招商局稅應解北洋海防經費計歷一年之久迄未解到絲毫似此貽誤事機實爲向所未有查此四結銀兩係前任監督俊啟現任監督崇光徵存俊啟既宕緩於前迨崇光到任接收交代卽應趕緊報解乃既不將前任銀兩補解清楚其本任徵起銀兩亦復任意延欠經臣查函疊催輒謂號商湊解京餉未能周轉僅允解銀三萬兩仍係空談尙未解到約計四結徵存北洋銀十餘萬兩並未開報數目且海防經費本係指定四成關稅與京餉應由六成稅內撥解者毫無牽涉何得混稱湊解京餉憑空套搭顯係飾詞搪塞玩視要需非洋屏蔽

京師海防關繫全局各省關應解經費實與京餉並重是以期限處分皆同臣前在西洋訂購快船水雷艇及鎗礮等項應需價值甚巨亟待現銀匯付又因新定鐵甲船價不敷奏明由北洋經

費內湊撥以免他省另措爲難原係統籌兼顧之意乃該關竟積欠至四結之多一皆歷次奏案

諭旨全未寓目儻他處相率效尤防務將致停罷尙復成何事體況此係按結徵收洋商現銀並不煩該監督另行籌措久存不解恐有虧挪情弊相應請

旨嚴飭粵海關監督崇光迅將徵存四結北洋經費銀兩勒限一月分兩批掃數解清一面將數目據實咨報查核嗣後務當恪遵前奉

上諭按結提前報解以濟要需而全大局儻再延欠卽由臣奏參照貽誤京餉例議處並懇

敕下廣東督撫臣一體飭催勿任支展理合恭摺由驛具陳伏乞皇太后

奏
皇上聖鑒訓示施行謹

熱河圍場移駐弁兵摺

光緒七年閏七月初十日

奏爲熱河圍場地酌撥綠營弁兵移駐以資協守恭摺仰祈
聖鑒事竊熱河圍場克勒溝等處前設同知司獄巡檢各員經管
錢糧緝捕等事應有弁兵協守當於河屯八溝兩營內撥兵四十
名先行移駐一面會同奏報旋經兵部議覆應於圍場駐防滿營
內就近移撥如滿營官兵不足彈壓卽於河屯八溝綠營內酌量
移撥等因經臣等飭查滿營官兵不敷移撥其河屯八溝等綠營
汛地遼闊周圍至三四千里本亦難於抽調惟圍場地方緊要旣
經添設文員自應於綠營內酌撥弁兵移駐以期兼顧據圍場同
知擬撥千總等四員兵一百名當經知照提臣飭於河屯協三營
內撥給馬步守兵五十四名八溝四營內撥給馬步守兵四十六
名除先撥四十名應再找撥六十名又撥八溝營千總一員惟把

總外委無可移撥若格外添設又須增費擬於現撥兵一百名內
裁去馬兵四名步兵二名添設經制外委三員額外外委一員卽
以裁去六兵之餉作爲添設四弁餉米養廉之需以上共合千總
等五員兵九十四名應於圍場克勒溝同知公所附近地面駐紮
千總一員協防額外外委一員馬步守兵四十名鑲黃旗地面駐
紮經制外委一員馬步守兵十六名正紅旗地面駐紮經制外委
一員馬步守兵二十三名罕特莫爾川地面駐紮經制外委一員
馬步守兵十五名統歸唐三營守備管轄責令各按汛地協同文
員防守實力巡緝盜匪保護商民不得玩懈應否添設營房飭由
該同知等察酌就近稟請都統臣核辦至馬步守兵內先撥之四
十名前經量加口糧候撥定停止今旣撥定應仍令統按原營
底餉支食無庸再加以歸一律除分飭遵照外所有圍場地酌

撥綠營弁兵移駐綠山理合會同熱河都統臣崇綺直隸提督

李長樂恭摺具陳伏乞

皇太后

皇上聖鑒敕部知照謹

奏

釐定商船津貼摺

光緒七年閏七月初十日

奏爲安州等處過往船隻向有津貼要差現經申明定章嚴禁額外勒索以綏商旅恭摺仰祈

聖鑒事竊准部咨光緒七年四月二十九日奉

上諭給事中樓舉曾奏直隸安州雄縣新城地方近有匪徒勾結蠹役私設卡局抽收船戶錢文名曰船頭勒索行旅大爲地方之害請飭嚴禁等語該處爲往來通衢豈容匪徒私立船頭名目擾害地方著李鴻章飭屬查明一律嚴禁以恤商旅欽此當飭清河道葉伯英於出省防河之時認真查辦茲據該道詳稱安州北關雄縣南關新城縣白溝河爲津省水路要衝每年有承運西陵米石並經管漕運官剝船隻

陵米例傾水腳無幾官剝工食亦微均須片籌貼補且夏秋陸路

被水往來文報及餉鞘人犯均應改由水路遞送船差絡繹供億甚繁該州縣並無例設水驛不能開支工料而運米等項又屬要差勢難延誤是以向章借資過往商船津貼派撥船頭常川伺應以期上不誤差下不累民並非私設卡局亦與任邱趙北口情形不同同治十一年船戶馬萬福呈控安州船頭訛索飭據保定府查訊將向章所收錢數酌量議減凡大貨船每隻津貼制錢四百文小貨船每隻津貼制錢一百文煤船每隻津貼制錢二百五十文其餘商貨回空及官民坐船概免津貼又雄縣新城於光緒二
年文安縣船戶張萬成等呈控案內飭據司道查明酌議津貼錢數凡滿載貨船如願包年每歲不論往來次數多寡大對子船津貼制錢二千文小對子船津貼制錢一千四百文廠船津貼制錢一千八百文如願按次津貼大對子船津貼制錢四百五十文小

對子船津貼制錢二百五十文廠船津貼制錢四百文蓬船等船
津貼制錢二百文其餘貨船回空及官民坐船概免津貼均經臣
核定批准榜示河干其雄新二縣並已刊立碑石在案該道以該
船頭等果皆照章收取津貼供應差務何至擾累商旅噴有煩言
乃訪聞商船於交納津貼之外尙有規費顯係船頭書役從中勒
索卽經督飭各州縣將船頭書役人等捉案責革一切浮費盡行
裁除由該道刊刻原定津貼章程嚴禁需索告示在於省城南關
安州北關雄縣南關新城縣白溝河及商船往來停泊埠頭徧行
張貼並飭該州縣重泐碑石樹立河干一面將告示移送天津官
船局曉諭船戶一體遵守備該船頭等再敢額外需索許船戶卽
赴所在地方衙門喊控立拘該船頭等嚴行究辦柳示河干該管
州縣稍有徇庇或漫無查察別經發覺亦卽從嚴參辦等情具詳

前來臣查直隸賦額甚輕原因

畿輔重地徭役較繁須藉商民之力以資挹注船差亦其一端從前沿河州縣曾有匪徒勾通書役索詐商船疊經臣與司道等訪聞查辦將並無差務各處私設船頭卡局禁革殆盡並於天津設官船局均平差徭照民價雇用不准絲毫擾累安州雄縣新城既有年例剝運

陵米等項要差地方又皆瘠苦勢難加派民間是以向借過往商船津貼係爲體恤閭閻免誤差務起見歷就該州縣因差輕重議定津貼章程酌減收數尙屬公允惟該船頭等藉端格外勒索殊堪痛恨現經葉伯英督飭該州縣提案責革除盡浮費將津貼章程徧行曉諭重泐碑石應飭該司道等隨時認真督察嚴禁永遠不准浮收分文以緩商旅儻州縣及吏役稍有擾害卽分別從嚴

參辦理台恭摺陳伏乞

皇太后

皇上聖鑒謹

奏

李文忠公奏稿卷四十一